

# Biodibertsitatea izango dute oinarri aurtengo Naturaldia jardunaldiek

**Natura** » Koldobika Jauregik irekiko du etzi ekimena; Jane Goodall-en hitzaldia da aurtengo azpimarragarriena.

INIGO TERRADILLOS

Nazio Batuek 2010a Biodibertsitatearen Nazioarteko Urtea izendatu dute, Planetako bizia eta aniztasun biologikoaren balioa ospatzeko urtea, hain zuzen. Gesto Naturako kideek aintzat hartu nahi izan dute ospakizun hori, eta aurtengo Naturaldia jardunaldiak biodibertsitatearen inguruan antolatu dituzte, *Bizi bizia* lelopean. Hala, etzi hasiko den ekimenak «biodibertsitatearen garrantziaz eta gaur egun dituen arriskuez ohartaraztea, hausnartzea, eztabaidatzea eta kontzientzia» izango du helburu.

Koldobika Jauregi Alkizako eskulturgileak egin du aurtengo kartela, eta bera izango da etzi jardunaldiak zabalduko dituen, kartel erraldoia Tolosako Kultur Etxean jarri. Gipuzkoako flora eta faunaren aberastasuna erakutsiko duen



Rafael Uribarren, Karlos Ormazabal, Jokin Bildarratz eta Shole Martin, atzo, Naturaldiaren aurkezpenean. I. TERRADILLOS

*Biodibertsitatearen atarian* erakusketa ere etzi inauguratuko dute Zerkausion, eta irekiera osatzeko arrantza eta biodibertsitatearen inguruko hitzaldia izango da.

Egitarauaren aniztasuna nabarmentzeko da, hitzaldiez gain, erakusketak, ikus-entzunezkoak edota dantza emanaldiak izango baitira. Hori bai, denetan azpimarratu beharrekoa Jane Goodall natura-

listaren parte-hartzea da. Bizi osoa igaro du Afrikako txinpantzeen jarrera aztertzen, eta sari ugari jaso ditu. Hitzaldi hori ez da Tolosan izango, izan ere, beste urteetan bezala, Naturaldia Gipuzkoara zabalduko da. Hala, Goodall-en hitzaldia Hernaniko Txillida Lekun izango da, eta Donostian, Zarautzen eta Errenterian ere izango dira ekitaldi gehiago.

## «Aberastasuna zaintzea guztion zeregina da»

Atzo egin zuten aurtengo Naturaldiaren aurkezpena, eta bertan izan ziren antolatzaileak eta jardunaldiak babestu zituzten erakundee-tako ordezkariak. Karlos Ormazabal Gipuzkoako Foru Aldundiko Garapen Iraunkorrekoko Diputatuak «azken 21 urteetan Gesto Naturakoek Naturaldia antolatzen

egin duten lana» goraiatu zuen. Horrez gain, biodibertsitatearen urtea ospakizunerako aitzakia dela, baina gizartea kontzientziazteko ere balio behar duela azaldu zuen: «Gure natura eta biodibertsitatea gizarteari hurbiltzen saiatuko gara, baina era berean, hori guztia zaintzea guztion zeregina dela ikusarazi nahi dugu».

Rafa Uribarren Foru Aldundiko Landa Ingurunearen Garapeneko Diputatuak Gipuzkoak duen aniztasun biologikoa nabarmendu zuen, «%6a baitu hiria, eta gainera, koa landa, hau da, mendiak, ibaiak, maldak...». «Gure arbasoek aberastasun hori mantendu zuten bezala, guri dagokigu orain zaintzea, gure ondorengoek ere egun dugunaz gozatzea nahi badugu», esan zuen.

Bestalde, Jokin Bildarratz Tolosako alkateak «bizi dugun egoera zailean horrelako kalitate-dun egitaraua osatzeko antolatzaileek egindako lana» azpimarratu zuen, «ilusio handiz aritu baitira urtero legez». Halaber, kalitatea bai hitzaldietara datozen adituetan bai eta jorratuko diren edukietan dagoela gehitu zuen.

Shole Martin Gesto Naturako kideak Naturaldia antolatzen lagundu duten guztiak eskertzearekin batera, herritar guztiak gonbidatu zituen parte hartzera, «gure helburua biodibertsitatearen garrantzia gizarteratzea baita».

## » EGITARAUA

### ERAKUSKETAK

#### 'Biodibertsitatearen atarian'.

■ **Zerkausion. Irekiera, etzi, 19:00etan.** Gipuzkoako fauna eta floraren aberastasuna erakusten duten tamaina handiko 15 argazki osaturiko erakusketa izango da ikusgai Zerkausion. Argazki bakoitza irudi txikiago batek lagunduko du argazkia non aterata dagoen jakin dezagun.

#### 'Hala ere, Natura gara'.

■ **Aranburu jauregian. Larunbatean irekiera, 19:30ean.** Nisa Goiburu artista tolosarrak Naturaldirako bereziki prestaturiko arte erakusketa, teknika desberdinak erabiliz, besteak beste, pintura, kolaxa, instalazioa, eskultura eta argazkia. Joaquin Araujo idazle eta naturazaleak, Joxan Goikoetxea musikariak, Inma Goiburu sopranoak eta Nisa Goiburu berak hartuko dute parte inaugurazioan.

### HITZALDIAK

'Arrantza eta itsasoko biodibertsitatea: irtenbiderik gabeko auzia?'

■ **Kultur Etxean. Etzi, 20:00etan.**

Daniel Pauly Biologia eta Ozeanografian doktoreak emango du. Xavier Pastor Oceana erakundearen Europako zuzendari exekutiboak eta Lorenzo Motos AZTI-Tecnaliako Itsas Ikerketa Saileko zuzendaria ariko dira aurkezle bezala. Kultur Etxean, etzi, 20:00etan.

'Mundu mailako aldaketa eta biodibertsitatea, sostengagarritasunaren ikuspegitik'.

■ **Kultur Etxean. Apirilaren 19an, 20:00etan.** Luis Jimenez Herrero Espainiako Sostengagarritasunaren Behatokiaren (OSE) zuzendari exekutiboak emango du, eta Demetrio Loperena Administrazio Zuzenbideko katedradunak aurkeztuko du.

'Biodibertsitatea... Ibilaldia Capbretongo fosatik Aizkorri'.

■ **Kultur Etxean. Apirilaren 20an, 20:00etan.** Iñaki Aizpuru Klima aldaketa eta biodibertsitate Saileko teknikariak, Raul Castro AZTI-Tecnaliako Itsas Ikerketa Saileko kideak eta Iñigo Mendiola Biologia eta Landa Ingurunearen Garapeneko Departamentuko kideak

hartuko dute parte, eta Aitor Lekuona Garapen Iraunkorrekoko Departamentuko teknikariak aurkeztuko du.

'Biodibertsitatearen zaintze laneko demak: UICN erakundearen eginkizuna'.

■ **Kultur Etxean. Apirilaren 21ean, 20:00etan.** Pedro Rosabal Gune Babestuen Programa Orokorreko zuzendariondokoaren eskutik. Ramon Elozegi SEO/Birdlife elkartearen Euskadiko ordezkaria izango da aurkezlea.

### IKUS-ENTZUNEZKOAK

'Flysch, haitzen hitza'.

■ **Leidor aretoan. Apirilaren 22an, 19:30ean.** Asier Hilario geologoaren eta Alberto Gorritiberea zinegilearen Zumaiako Flysch-ari buruzko lana da. Flysch-aren harrizko geruzak Lurraren milioika urteko historia kontatzeko gai dira. Lan honetan lurreko zientzietako ikerlari handiek hartu dute parte; horien artean Miguel Delibes de Castro, eta aurkezpenan izango

da Hilario eta Gorritiberea egileekin batera.

### EMANALDIAK

'Natura Gara'.

■ **Zerkausion. Maiatzaren 30ean, 12:00etan.** Giza gorputzak, gorputz adierazpenaren forma gisa hartuta, eta dantza klasikoaren magiak tokia izango dute Naturaldian. Gipuzkoako Dantzari Profesionalen Elkartearen lankidetzari esker eskola desberdinetako dantzariak emanaldia eskainiko dute.

### GIPUZKOAN

'Bizitzaren edertasunetik, edertasun hori mantentzeko obligazioa'.

■ **Zarazuko udaletxean, maiatzaren 12an, 19:00etan eta Errenteriko Reina aretoan, maiatzaren 13an, 19:00etan.** Joaquin Araujo idazle eta naturalistaren eskutik.

'Biodibertsitatearen atarian'.

■ **Donostian. Ekainaren 4tik aurrera.** Cristina Enea Fundazioaren Ingurumen Baliabideen Zentroan.

'Jane Goodall: 50 urtez ikertzen Gomben'.

■ **Txillida Leku Museoa. Azaroaren 9an, 19:30ean.** Biodibertsitate Biologikoaren Nazioarteko Urtearekin bat eginez, 50 urte betetzen dira aurtengo Jane Goodall Gombeko (mendebaldeko Tanzania) parke nazionalera iritsi zenetik. Naturalista eta primatologa ingelesak ia bizitza osoa igaro du Afrikako txinpantzeen jarrera aztertzen. Sari ugari jaso ditu: Tanzaniako domina, National Geographic Society erakundearen Hubbard domina, Japoniako Kyoto saria, Asturiasko Printzea saria edota Nazio Batuen Erakundearen *Bakearen mezulari* izendapena 2003an.



Jane Goodall Tanzanian txinpantze batekin. HITZA

## MENDI-ALDE

Eguneko menuak eta karta  
Bataioak, Jaunartzeak...

## Jatetxea

San Esteban auzoa, 39 • Tel.: 943 65 17 99 • 20400 TOLOSA

## Iragarki laburrak

### LANA

■ **Ileapaintzailea.** Ibarra iletan ibiltzeko behar du. [metxa2@yahoo.es](mailto:metxa2@yahoo.es). 609 79 27 87.